

李文忠公奏稿

李文忠公奏稿

卷之四十六目錄

查覆李鳳苞被參各款摺

光緒九年正月二十日

議結常勝軍舊欠洋債摺

光緒九年正月二十日

瀆懇賞假葬母摺

光緒九年正月二十六日

續造鋼甲快船摺

光緒九年二月初八日

遣撤霆軍輪船經費片

光緒九年二月初八日

旅順籌防費難預估片

光緒九年二月初八日

海防兵餉分別增裁摺

光緒九年二月初八日

登瀛洲輪船留巡朝鮮片

光緒九年二月初八日

機器局經費奏報摺

光緒九年二月十六日

准假歸葬謝摺

光緒九年二月十六日

邊防撥餉製造片

光緒九年二月十六日

法越筆數片

光緒九年二月十六日

軍機大臣

字寄

光緒九年三月二十日奉到

軍機大臣

密寄

光緒九年三月三十日奉到

軍機大臣

密寄

光緒九年四月十一日奉到

暫駐上海摺

光緒九年四月二十四日

刊刻木質關防片

光緒九年四月二十四日

請飭潘鼎新蒞辦片

光緒九年四月二十四日

軍機大臣

密寄

光緒九年四月二十七日奉到

覆奏劉銘傳

可寄邊防片

光緒九年五月十二日

定期赴津摺

光緒九年六月初一日

潘鼎新赴湘撫任片

光緒九年六月初一日

抵津仍回署任摺

光緒九年六月初九日

奏留薛福成片

光緒九年六月初九日

懇辭兼署直督摺

光緒九年六月十四日

展接津通電總摺

光緒九年六月十四日

山海關截留餘稅片

光緒九年六月十四日

再辭直督摺

光緒九年六月二十一日

營口礮臺營制摺

光緒九年六月二十一日  
附改練馬步隊章程

辦理朝鮮商務章程摺

光緒九年六月二十一日  
附清單

陳樹棠總辦朝鮮商務片

光緒九年六月二十一日

李文忠公奏稿卷四十六

全集一之四十六

桐城吳汝綸編錄

查覆李鳳苞被參各款摺

光緒九年正月二十日

奏爲遵

旨訪查原實覆陳仰祈

聖鑒事竊臣承准軍機大臣字寄光緒八年十二月十六日奉

上諭有人奏出使德國之李鳳苞係負販小夫略通西語鑽營保薦出使以來不遵定制私帶武弁並有挾妓出游恣情佻達情事等語使臣職任關係緊要所參李鳳苞各節是否屬實著李鴻章訪查明確據實具奏原片著鈔給閱看等因欽此伏查李鳳苞係江蘇崇明縣人由附生調往上海機器局測繪西洋各國輿圖講求洋務有年嗣丁日昌督辦船政委赴閩廠總監工旋派學生出

洋習藝又經臣會同福建督撫船政大臣奏委該員管帶前往英法督率料理光緒元年總理衙門奏保出使人員卽有李鳳苞在內三年郭嵩濂在英法使臣任內奏稱李鳳苞勤慎耐勞堪勝出使德國等語是李鳳苞以諸生襄辦局務留心經世之學既非出身微賤負販小夫可比其才堪出使經內外大臣詢事考言秉公保薦亦非由鑽營而來至原奏所稱裝學外夷不遵定制及挾妓出游恣情佻達各節臣密詢前在德國學藝之都司王得勝等現充臣處水師營務處前在德國使館繙譯之知州羅豐祿僉稱李鳳苞謹守禮法德國外部兵部海部皆引重之並無夷裝挾妓佻達等情事又原奏私帶武弁一節臣等前奏派李鳳苞監督出洋生徒內多水師武弁接任出使後復奏請購辦鐵艦軍火隨時派弁往從學習所辦皆係要公更非違例私帶竊以華洋相隔雖遠

中西消息易道如果李鳳苞在德有背本辱

命情事各國新聞紙必早傳播中國員弁自外洋回者當共見聞  
臣留心訪查均無影響該大臣駐德四年以來書問時通於泰西  
各邦船礮機器軍政新法探討入微心精力果一時罕有其匹即  
於各國交涉事宜亦能不激不隨洞中肯綮實無貽誤之處原參  
各節自由傳聞之說應請無庸置議至原片內稱向例

冊封藩屬必備文學侍從之臣嗣後遣使當慎選科目中人等語  
夫科目人才輩出不盡嫻習於折衝

冊封典禮至隆並無辯論之公事若出使東西洋各國關係綦重  
情形迥異所有主客強弱之形勢剛柔操縱之機宜必須歷練稍  
深權衡得當庶足維

國體而固邦交似不必專於文學科目中求之致有偏而不舉之

患管窺一得未知有當

高深否所有訪查明確緣由謹繕摺由驛據實覆

奏伏乞

皇太后

皇上聖鑒謹

奏

議結常勝軍舊欠洋債摺

光緒九年正月二十二日

奏爲查明常勝軍舊欠美商洋行帳目先行籌款議結恭摺仰祈  
聖鑒事竊臣於上年十一月間接准總理各國事務衙門函稱美  
國洋行及高橋輪船各帳爲常勝軍積年未了之事先經兩江督  
臣沈葆楨會商斷還而該公使西華未肯照結現任公使楊約翰  
復請與臣處商辦令其參贊何天爵赴津面議或就原索之數減  
成扣算或就該國存款剋數抵銷屬由臣相機酌辦並鈔案錄寄  
到臣旋由何天爵持該使楊約翰函於十二月初五日抵津會晤  
開送前案節略前來臣督同津海關道周馥等詳查案冊悉心考  
核並與何天爵往復辯論一月有餘幾於唇焦舌敝該參贊堅索  
全還不稍減讓查此案延擱已將二十年原辦道員吳煦楊坊久  
經物故中證亦多散亡光緒三年沈葆楨允還銀四萬餘兩係憑

己意爲定斷以致仍難速了此次若不與設法清結遷延日久積  
息愈多勢必更增鞦韆且係臣在江蘇巡撫任內之事自應設法  
商辦妥協以免葛藤檢查卷內有同治二年九月吳煦與西華第  
二次公舉金能亨亨百里二人結算各帳蓋印合同聲明各節尙  
爲切實因與何天爵再四籌商議將當日中人斷明應還之常勝  
軍洋行欠帳先爲清算計共應給還本利銀三萬七千六百六十  
五兩六錢二分八釐仍由淮軍月餉項下照數通融撥給彙案造  
銷至高橋輪船租價賣價各欠帳原中有租價不應還之說而西  
華等復集眾證刊印成本屢年曉濟不已沈葆楨亦斷爲應還之  
款自未便置之不議惟查有廣東賠款餘存一項美國戶存上議  
院遞年生息聞已有六十餘萬元該國員紳頗有謂此款應撥還  
中國者光緒五年四月曾有天津籌賑局紳董公稟美國前總統

格蘭忒批允轉商議院核辦楊約翰何天爵亦言如洋行高橋各  
案清結其賠款餘存當卽議還臣籌維至再允俟此款歸還有日  
再行議結高橋船帳以期互相抵制嗣准何天爵照覆允將洋行  
欠項一案先行照銷所收本利銀兩取有華洋文印收存卷高橋  
船案並允暫緩商辦業於正月十六日起程回京除將此案議辦  
詳細情形緘咨總理各國事務衙門查照外所有議結常勝軍洋  
行欠帳在於淮軍餉內通融撥還緣由理合恭摺具陳伏乞

皇太后

皇上聖鑒敕部知照謹

奏

瀆懇賞假葬母摺

光緒九年正月二十六日

奏爲臣母葬期已近瀆懇

天恩

賞假回籍以父大事恭摺仰祈

聖鑒事竊臣於上年十二月十七日瀝陳下情請假營葬一摺欽

奉  
上諭披覽所奏情詞懇切良用惻然本應俯如所請寬予假期惟  
北洋事務關係緊要李鴻章措置得宜朝廷方資倚畀所有請假  
營葬之處俟來年正月二月閒再降諭旨等因欽此仰蒙

訓勉周詳

嘉矜備至旣

廬念畿防之要復曲憐臣下之私自愧驚庸渥邀

恩眷跪聆之下感泣難名入春以來靜候

俞旨本不敢以哀痛迫切之情屢瀆

天聽惟時序如流河冰已解屈指啟窆之期不過一月有餘而自津及皖計程遙遠雖輪船便捷亦須十餘日始抵臣鄉且一切附棺之需非先事摒擋逐加檢點卽禮儀粗具而造次襄事終覺不慊於心記曰孝子將祭慮事不可以不豫一祀事尙從容籌備況於先人體魄所藏而忍有苟簡疏略之思乎此臣月餘來瞻念松楸神爽飛越昕夕引領以冀

恩詔之至而軍書填委公私交迫於中輒忽忽如有所失也方今仰賴

聖主威福防務綏平中外交涉事宜未甚喫緊用敢再申前請仰懇

天恩

賞假數月俾得趕緊回籍稍遂負土之私感荷

於全實無既極署督臣張樹聲現將假滿並請

飭令迅卽來津仍舊兼署通商篆務以便微臣剋期就道所有臣

母葬期已近瀆求

賞假緣由理合繕摺瀝陳伏乞

皇太后

皇上聖鑒訓示施行謹

奏

續造鋼甲快船摺

光緒九年二月初八日

奏爲訂造鋼面鐵甲船兩號計期竣工現擬續造穹面鋼甲快船一隻以備出海輔佐鐵艦之用恭摺具陳仰祈

聖鑒事竊臣於光緒七年四月奏請籌款計造鋼面鐵甲船二號經戶部議准撥款濟用聲明續造鐵艦二隻俟二三年後各省財力稍寬再酌度情形奏辦等因奉

旨依議欽此欽遵行知在案臣與出使德國大臣李鳳苞往返電函商令訪查新式在德國伏耳鏗廠妥訂合同刻期次第開造並由臣擬第一號鐵艦名曰定遠第二號鐵艦名曰鎮遠檄飭江海關道分批匯撥價銀前據李鳳苞函稱定遠於本年正月工竣驗收約三月間開駛來華鎮遠則須本年十月工竣必賴該大臣就近隨時督催一手經理其原擬續造鐵艦二隻一時既無此巨款

而中國洋面遼闊計定遠鎮遠兩船到後仍屬不敷分布適總稅務司赫德覓呈英廠新式加大碰快船圖說每隻索價六十餘萬兩據稱可禦鐵甲且復鈔寄李鳳苞在洋悉心考較旋准函稱徧詢各國海部僉謂隨鐵艦出洋之船必須能受風浪能禦敵礮赫德所擬加大碰快船一遇風浪則礮難取準偶受小礮卽船已洞穿徒欲擊敵而不能防敵擊終不足恃今查英法德所造皆用二三寸厚鐵甲名曰穹面鋼甲快船可在大洋禦敵交鋒爲最新之式定購一隻連克鹿卜後膛大礮三尊約價三百一十一萬七千馬克合中國銀約共六十二萬餘兩配用魚雷箭及連珠小礮不在其內其價與赫德所呈加大碰快船相等而得力更多應否訂購等語臣思鐵船來華必有精利快船輔佐巡洋或作先鋒或爲後應以厚集其聲勢茲李鳳苞探詢新式穹面鋼甲快船喫水十五

尺八寸實馬力二千八百匹歷水力二千三百噸每點鐘駛行十五海里約合中國五十里其機艙等鋼而約厚三寸半礮臺周圍則有厚十寸之鋼面甲足可與鐵艦相輔而行實爲海上戰巡利器當卽電屬該大臣照式訂購一隻妥議合同及詳細程式昨據電覆已與伏耳鏗廠定議限四月工竣計光緒十年春夏間可與第二號鎮遠鐵艦先後開駛來華所需船礮價銀分期陸續匯付擬於北洋海防經費存項及招商局按年撥還官本內酌量勻湊如有不足容臣再行請

旨飭撥接濟庶水師之規模漸擴藉可禦外侮而壯聲威至臣前奏請船政定造快船二隻專爲巡護朝鮮口岸之用業經戶部議覆指撥各省關銀八十萬兩並查明出使經費項下現存若干酌提挪用臣已札行江海關道查議具覆應俟覆到再行核辦惟前

據船政大臣黎兆棠函稱南洋屬造快船五號臣處擬造快船二號必先籌款開拓廠地添設機鑪廣集工料否則緩不濟急約計拓廠添機既需歲月卽此七船分起訂製亦非八九年不能藏功況黎兆棠現已假歸尤慮無人督籌難以剋期集事查船政所造快船式樣不及穹面鋼甲之精堅將來或就部撥各款在洋廠續製抑仍在船政訂造之處並由臣隨時察酌情形續行奏辦合併聲明所有籌購穹面鋼甲快船以備輔佐鐵艦各緣由謹繕摺由驛具陳伏乞

皇太后

皇上聖鑒訓示謹

奏

遣撤霆軍輪船經費片

光緒九年二月初八日

再據天津海防支應局詳稱奉准兵部咨遣撤霆軍用過輪船經費飭令趕緊造報等因遵查光緒七年五月十四日奉

上諭鮑超所部步隊二十一營馬隊六營駐紮樂亭現在防務稍鬆裁撤步隊十一營馬隊二營派員分起管帶回籍仍由輪船行走所需經費籌款應付又奉閏七月十四日

上諭鮑超所部留防馬步十四營全行裁撤仍由輪船裝運赴鄂各等因欽此經臣欽遵

諭旨行飭招商局先後派撥海定海晏懷遠利運永清鎮東日新興盛等船將奉撤霆軍步隊二十一營馬隊六營官弁勇丁一萬七千三百三十八員名分批裝送每名水腳按五兩核計共合銀八萬六千六百九十兩飭由天津支應局於海防經費項下照數

給領詳報在案查輪船載兵水腳向無例案可循同治四年天津洋鎗隊由海道飛援山東煙臺專雇美商輪船裝運計每官兵一名合水腳銀七兩一錢五分經前通商大臣崇厚奏奉准銷有案此次招商局輪船裝運道撤筵軍官弁勇丁自撫甯縣之洋河口登船渡海入江赴漢口卸載路程何啻五六倍之多每名僅合銀五兩雖值商局生意減淡輪船回空就便亦實由該局紳商情殷報效是以格外減省不特他省情形不同未便比較卽北洋亦難援爲常例嗣後如再用輪船裝兵浮海仍應察酌時勢情形與該局妥議定價核實請領等情請奏前來臣覆核無異除飭將所發水腳銀兩彙案造銷外理合附片具陳伏乞

聖鑒謹

奏

旅順籌防費難預估片

光緒九年二月初八日

再據天津海防支應局詳稱現奉戶部議奏軍需報銷章程內請  
飭南北洋大臣總計常年經費若干如有添購經費雖不能限以  
定數亦當立有範圍事前奏明報部立案事後方准核銷等因查  
海防與尋常防務不同海防各事情形又各不相同北洋現辦防  
務以旅順工程最爲繁鉅旅順島在奉天金州海口距山東登州  
煙臺對岸二百餘里洋面至此一束東接太平洋西扼渤海咽喉  
爲奉直兩省第一重門戶卽爲北洋最要關鍵北洋創練水師兵  
船漸增指日鐵艦來華更應擇定要隘以爲停泊歸宿之處庶出  
可截勦敵船退可扼險自守旅順口有黃金雞冠等山爲之屏蔽  
內有東西兩澳四山圍拱沙水橫互形勢天然惟外口淺狹內澳  
淤平必須挖濬淺灘展寬口門方能多泊兵船必須建大船塢方

能修理鐵艦快船必須添造庫廠儲備一切方能接濟水陸糧餉軍火尤必須分築礮臺控制洋面護衛鴨澳使舟師與陸師相爲依輔其餘應辦各工指不勝屈據洋員之精於兵事者僉稱西國遇有此等天險可爲水師窟穴必以全力注之所費恆至數百萬卽數千萬金亦所不惜北洋歲收經費有限除去購船養船置器習藝等費所餘無幾祇可就現有財力逐段竭蹶經營前派洋員漢納根協同局員創建該口黃金山頂礮臺一座仿照德國新式堅大玲瓏實爲各路礮臺未有之式現甫就竣計用銀十二萬餘兩又築壩開井修路建屋等工截至光緒八年年底止用銀四萬餘兩尙未完竣其餘各工正在次第籌畫興辦誠以旅順工程關係最重經始甚難開山濬海工大費鉅購料運器於西洋派員雇夫於直省與內地工程做法迥異旣不敢函莽剋期求速亦不便

預先約略虛估祇就北洋現收經費陸續勻撥並未請另撥鉅款  
其有工作可借勇力者藉以節省總期較洋人用費力求撙節然  
斷不能限以定數詳請奏咨立案前來查光緒七年十月內臣於  
驗收快碰船巡洋之便曾將旅順口籌防緣由奏明至建築黃金  
山礮臺亦由支應局於光緒六年北洋經費報銷案內開報各在  
案旅順籌防實爲北洋必不可緩之工經臣飭派候補道袁保齡  
駐工督率擬將挑挖澳身疏濬海口建築船塢葺造庫房添建礮  
臺各工逐漸舉辦此卽其大概範圍也該處工程仿照西法多與  
洋人交涉絕無例案可循洵難預爲估定致有窒礙應由臣督飭  
承辦各員隨時隨事核實勘辦不准絲毫浮冒除俟水師規模粗  
具飭將動用各款彙案詳細據實冊報外理合附片陳明伏乞  
聖鑒敕部知照謹

奏

海防兵餉分別增裁摺

光緒九年二月初八日

奏爲天津海防大沽北塘新城兵餉酌量分別增裁照章陳明立案仰祈

聖鑒事竊准戶部奏咨外省軍需善後報銷章程內開凡從前未經奏明兵勇數目營制員弁薪水口糧等項仍照前章統限三箇月奏明報部以後增裁勇數餉數隨時奏咨立案不准於奏銷後補報亦不得隨冊聲明等因查天津海防支應局自同治二年起至光緒七年止歷年用款均經造冊奏銷歷屆准銷之成案卽將來報銷之根據惟光緒八年正月因大沽海口等處礮臺爲北洋緊要門戶關係至重原派守臺兵丁不敷分布其月餉數目較之直隸練軍章程亦有短少未免偏枯非酌量加兵加餉不足以臻嚴密而期飽騰經臣飭將大沽協抽練洋鎗隊兵丁七百名遣歸

原營合之該處原有兵丁一千一百名計共一千八百名並添募  
伙夫一百八十名每月酌加餉銀共二千二十四兩有奇又北塘  
海口礮臺原有官兵二百五員名加撥兵丁二十名添併駐紮每  
月酌加餉銀一百五十七兩有奇又新城礮臺原有官兵三百三  
十三名加撥天津鎮標官兵一百七十七名計共五百名每月酌  
加餉銀六百八十四兩有奇核與練軍餉章不甚懸殊而海口防  
務可期周密其大沽北塘新城三處官兵原領月餉底餉業經歷  
年報部准銷有案此次月加餉銀二千八百六十六兩有奇該局  
入不敷出自應酌量裁減挹彼注茲查有駐紮津郡後路之雲字  
馬隊右營防務較鬆飭卽妥爲裁撤每月節省餉乾銀一千七百  
二十二兩有奇又迴回大沽洋鎗隊兵七百名月省員弁薪水銀  
七百三十四兩又省兵丁原領衣帽月攤銀一百四十五兩統共

每月節省銀二千六百餘兩以減抵增所短無幾尙可設法勻支  
茲據海防支應局司道查明此項加發停發各餉係隨時增裁之  
款遵照部章詳請奏咨立案前來臣覆查無異除飭將支發細數  
起止日期彙案造報並分咨戶兵二部外理合繕摺具陳伏乞  
皇太后

皇上聖鑒敕部知照謹  
奏

登瀛洲輪船留巡朝鮮片

光緒九年二月初八日

再准兩江督臣左宗棠咨稱奏飭澄慶登瀛洲兩兵船駛回南洋以期兼顧奉

旨著該督咨照李鴻章將兵船兩號調回南洋備用欽此自應欽遵辦理惟查上年朝鮮內亂遵

旨酌派水陸各軍迅赴事機經臣樹聲奏派廣東水師提督吳長

慶督帶六營東渡並咨調南洋登瀛洲澄慶威靖兵輪三號聽候

差遣嗣因該國內亂已平防務稍鬆威靖澄慶兩船業於上年冬

閒先後飭令駛回南洋吳長慶一軍遠駐朝鮮王城彈壓教練其

後路轉運糧械接遞文報必須專派兵船往來策應方期便捷且

日本兵船尙駐朝鮮海口中國既有陸軍在彼駐紮關係尤重不

可無兵輪相爲依輔北洋現有各船內除鎮東等蚊船專備守口

不能遠涉重洋又鎮海泰安湄雲三船分駐天津煙臺營口該處皆係通商要口各僅有兵船一號巡防保護均關重要未便遠離又超勇揚威快船兩號威遠兵船一號北洋創練水師甫有端緒所購德國第一號鐵甲船不日來華亟須預爲籌備經臣飭令招募水勇選派出洋回華學生前赴各船交水師統領丁汝昌督率訓練以備鐵艦到後分配操巡並延英國水師副將琅威理幫同丁汝昌將應辦事宜隨時查察會商稟辦並令帶領威遠超勇揚威操江等船逐日在旅順煙臺一帶洋面嚴勤操練以期熟習風濤沙綫漸成勁旅只可爲朝鮮陸軍遙助聲勢未便專駐一處致有偏廢此外實無他船可派查上年冬間臣咨商福建船政局飭調海鏡輪船北來專辦吳長慶後路轉運事宜約計三四月間可到又吳長慶一軍久戍朝鮮上年十月業經奏明今春察酌情形

撤半回防仍留三營俟日兵一年期滿撤盡再議內渡所有前調南洋兵輪三號已飭兩號駛回僅暫留登瀛洲一號梭巡朝鮮海口應俟海鏡到防吳長慶所部撤留定局後運務稍節卽飭登瀛洲駛回南洋備用除咨撥左宗棠查照外謹會同署直隸督臣張樹聲附片具陳伏乞

聖鑒訓示謹

奏

機器局經費奏報摺

光緒九年二月十六日

奏爲天津機器局光緒六七年分動用經費各款循案開單奏報  
恭摺仰祈

聖鑒事竊查天津機器局經費奏明動撥津海東海兩關四成洋  
稅作正開銷截至光緒五年分止業經督飭局員將支銷款目查  
照歷屆成案開列簡明清單具奏並經總理各國事務衙門奏准  
津滬兩局每年成造鎗礮及各項經費除照章開單報部外仍令  
詳細知照該衙門一次以資考證等因咨行遵照在案臣查津局  
仿造西洋軍火供給海防水陸諸軍兼備各省咨領近年四成洋  
稅收數短絀支用不敷益以部撥邊防之餉俾資成造該局程課  
本嚴於勒名考成諸法日臻精密講求新式軍火參用中西物料  
變通斟酌總以節經費利工作爲主俾帑項不致虛糜茲據承辦

局務津海關道周馥候補道許其光潘駿德等詳稱光緒六七年  
間神機營暨朝鮮國均飭派弁兵來局學習分建習藝廠朝鮮館  
兩處局內添造淋硝新廠及本樣銅皮等庫三座電學房一所員  
匠住房五十餘間仿造西洋康邦氣機所省煤斤甚鉅添備神機  
營用器及各廠新器百數十具又成仙航小機船一號此外各營  
各船需用礮架等件隨時照造無誤其常年製成軍火計光緒六  
年分製成各項洋火藥六十四萬五千三百五十磅銅帽二千五  
百二十七萬顆林明敦後門鎗子一百十八萬七千顆格林礮子  
一百六萬五千顆毛瑟後門鎗子二十七萬三千四百顆前膛開  
花礮彈大小三萬五千四百三十筒後膛來福鎗鉛及銅箍大礮  
彈七千八百七十筒鐵羣子八百六十筒各式銅紙拉火十六萬  
二千三百十枝大小沈碰水雷及雷座電箱等三百五十二件光

緒七年分製成各項洋火藥一百三萬九千八百三十磅銅帽三千七十五萬顆林明敦後門鎗子四十二萬二千顆毛瑟後門鎗子三百五十一萬六千四百顆前膛開花礮彈二萬一千六百八十箇後膛來福銅箍大礮彈五千七百九十二箇鐵羣子七千箇大小沈碰水雷及雷膽電箱等二百九十九件又兩年以來製煉鋸水礮捲銅皮約成七十五萬餘磅雜成器目約五萬三千餘件動用經費上屆報銷案內原存銀二千一百一兩三錢三分二釐九毫三絲四忽存料約值銀十六萬一千餘兩光緒六七年分共領海關四成洋稅銀四十五萬三千九百九十九兩三錢二分四釐五毫又收北洋海防經費部撥邊防專餉各省劃還軍火價銀二十一萬七千六百六十八兩三錢二分四毫共支用銀六十四萬三千七百五十七兩六錢五釐二毫七絲七忽仍存銀三萬十

一兩三錢七分二釐五毫五絲七忽存料約值銀二十萬二千餘兩以上兩年用項委因成造日艱兼支應電機水雷局行營製造局挖河小輪等船動撥較繁又六年分因俄事緊急山海關煙臺營口等處大軍雲集征調頻仍東三省察哈爾庫倫等處支撥軍火孔殷節經增購礮器添造廠座加製火藥各項以備不虞雖視前兩屆用款增多實係節慎支用涓滴歸公並無絲毫日濫惟製造向宗西法料件半出外洋均無例價可循遵照戶部奏定新章八年十二月以前向開單者仍准開單懇請援案具奏等情臣查光緒六七年分係升任津海關道鄭藻如原任天津道吳毓蘭與道員許其光潘駿德等會商妥辦核其兩年軍火成件數目繁鉅或已撥水陸諸軍或分儲局所各庫均能兼顧邊海兩防有裨大局至考核機器局用款戶部奏稱雖不能限以定數亦當立有範

閣正與臣督飭局員日省月試之法相同據詳各節臣覆加查核並無浮冒該道等督率有方洵屬功歸實濟相應按照向章繕具簡明清單恭呈

御覽合無仰懇

天恩敕部查照成案准銷除分咨戶兵工各部暨咨總理各國事務衙門備查並飭將八年以後用款趕緊接續據實開報外所有天津機器局光緒六七年分動用經費據實開單緣由理合恭摺具陳伏乞

皇太后

皇上聖鑒訓示謹

奏

准假歸葬謝摺  
光緒九年二月十六日

奏爲恭謝

天恩並陳交卸起程日期仰祈

聖鑒事竊臣於正月二十六日奏請

賞假回籍營葬一摺欽奉

上諭覽奏情詞迫切出於至誠不得不俯如所請李鴻章著賞假兩箇月回籍營葬辦理北洋通商事務大臣著張樹聲暫行署理等因欽此踴誦之下感激涕零臣自去秋奉

命北來回禮從公耿耿此心如掬重咎抵津數月於一切中外交涉機宜水陸操防事件不過隨時措注未能大有設施比者一再陳情干瀆

聖聽徒以先人體魄未有所歸而燕雀啁噍之音遂不自知其煩

數人情疾痛呼父怨慕則號

天恃

君父之慈愛但求可以徑送其情而不復有所忌諱也幸蒙

聖主俯鑒愚誠給假回籍俾得躬親引紼安奠佳城不獨微臣慎

終之私情可以自致卽鮮民變禮之隱痛亦藉以稍紓感荷

矜全生生世世茲將臣張樹聲已於二月十一日行抵天津臣

卽飭派員弁於十七日齎送

欽差大臣關防通商文卷移交張樹聲接受任事並將洋務海防

重要事宜再三熟商詳細告知以便妥爲接辦臣一面料理行裝

擬於二十一日起程仍趁輪船航海溯江駛回皖籍所有微臣叩

謝

天恩並陳交卸起程日期理合恭摺具奏伏乞

皇太后

皇上聖鑒謹

奏

邊防撥餉製造片

光緒九年二月十六日

再臣於光緒六年九月議覆軍需用軍火案內請

敕部在西北邊防餉內月給津局銀一萬兩俾資造辦奉

旨著照所請戶部知道欽此欽遵在案七年冬開邊軍裁撤曾經

戶部覆准該局尚須供支庫倫察哈爾熱河等處軍火用項浩繁

仍照原案給領以濟要需復准戶部咨稱此項收支用款係該局

專案請領之款勿得歸併海防機器局案內牽涉開報等因節經

飭行遵照茲據該局詳稱職局常年經費本指津東兩關四成洋

稅比年製造加多稅收欠旺人不敷支時形掣肘又值邊營及西

北各軍同時徵調指撥軍火浩繁用款更鉅始蒙奏撥邊餉接濟

嗣經軍撤後北洋添練水師添製各項新式軍火需費愈多實賴

邊防月款藉資挹注在戶部飭令專案造銷原為各歸各款慎重

帑項起見但局中領到部餉均歸津海關庫收存按月給領往往洋稅與部款相開撥發其支用各款無非製造要需未便一事而劃分兩概盛同此廠工同此物料不過用款多則出活多並非以稅餉來源有別另作收支礙難以軍需造撥大宗強分簿籍現屆光緒六七年分領過部餉十五萬兩新收項下彙列入單開除項下一律造銷皆係實在情形非敢有意歸併牽涉致滋轉轍也嘗之食者多而添米合炊汲者多而導泉諸弊既食既汲之後再欲分晰泉米勢有不能惟是增領部餉之後添購機器加造軍火漏夜趨工無致貽誤水陸各軍領用藥料雷彈等項多於前年數倍局存軍火料物成數其在實用實銷毫無捏飾若責令將部款另案開報必致遷就挪移轉非核實之道擬仍彙單據實造報願請附奏前來臣查該局月請部撥銀一萬兩原以四成洋稅不敷藉

資接濟乃能多備軍實弗誤要需且北洋辦理海防亦邊防中之一事添練水師事體重大用物繁多僅請動支邊防月餉一萬兩竭蹶辦應本無畛域可分若必專案片報勢難逐事逐物強爲區別據詳各節確係實情理合附片具陳仰懇

天恩飭部仍照案按月撥給以裨軍儲曷勝感禱謹

奏

法越條約片 光緒九年二月十六日

再上年十月間准總理各國事務衙門函稱法國使臣竇海商辦越南交涉之事將過津與臣晤談旋據該使臣到津會商擬具越南分界通商三條屬爲轉寄總理衙門核酌經該衙門覆以應辦事宜總以異日兩國各派大員會議爲定並應由越南國王遣派大員隨同妥商嗣竇海抵上海復接該國外部回電內稱來議似可准行擬於今春請派員會議臣以此事若果會議必須有越南官員在旁以備商詢因思招商輪船局道員唐廷庚在越運糧與該國君臣素頗熟識卽電屬督臣曾國荃轉飭唐廷庚商同越南派明幹大官一二人於春間航海來華備問當經函達總理衙門在案二月初九日准曾國荃函稱已派唐廷庚及鹽大使馬復貴護送越南陪臣范慎適阮述附輪船來津據唐廷庚等

面稟該陪臣沿途積受風寒染患時證未能進見並轉呈越南國  
王咨文密函前來臣飭津海關道周馥爲之妥備館舍廩餼撥醫  
調治今該陪臣等病甫就愈臣卽同署督臣張樹聲傳詢一切目  
下聲接上海電報法國外部易人頓翻前議並有將該使寶海撤  
任回國之信是會議越事無期而越員既經來津亦可藉以查詢  
該國情實臣已密商張樹聲隨時相機因應並將越南國王咨函  
鈔送總理衙門查核外理合附片具陳伏乞

聖鑒謹

奏

軍機大臣

字寄

光緒九年三月二十日奉到

前大學士署辦北洋通商事務大臣一等肅毅伯李

光緒九

年三月十五日奉

上諭前因李鴻章奏請回籍葬親當經賞假兩月現在北洋事務緊要李鴻章營葬事畢著不必拘定假滿卽回署任該大臣公忠體國定能仰副朝廷倚任之意不至稍涉稽遲也將此由五百里諭令知之欽此遵旨寄信前來

軍機大臣

密寄

光緒九年三月二十日奉到

前大學士署辦北洋通商事務大臣一等肅毅伯李

光緒九

年三月二十五日奉

上諭前有旨諭令李鴻章卽回北洋大臣署任現聞法人在越勢更披猖越南孱弱之邦盤食不已難以圖存該國列在藩封不能不爲保護且滇粵各省壤地相接儻藩籬一撤後患何可勝言疊經諭令曾國荃等妥籌備禦惟此事操縱緩急必須相機因應亟須有威望素著通達事變之大臣前往籌辦乃可振軍威而顧大局三省防軍進止亦得有所稟承著派李鴻章迅速前往廣東督辦越南事宜所有廣東廣西雲南防軍均歸節制應調何路兵勇前往著該大臣妥籌具奏金革毋避古有明訓李鴻章公忠體國定能仰副朝廷倚任之重星馳前往相度機宜妥爲籌辦著將起

程日期及籌辦情形迅即奏聞以紓廩系將此由六百里密諭知之欽此遵

旨寄信前來

軍機大臣

密寄

光緒九年四月十一日奉到

前大學士署辦理北洋通商事務大臣一等肅毅伯李

光緒九

年四月初七日奉

上諭李鴻章奏豫籌越南邊防事宜各摺片前因越南情形緊迫諭令李鴻章前往廣東籌辦茲據陳奏各情所籌亦甚周密事機且夕變遷惟在隨時權衡辦理該大臣現由金陵前赴上海卽著暫在上海駐紮統籌全局將兵事餉事豫爲布置審度機宜再定進止著將籌辦情形隨時奏聞其緊要事件並著由電信寄知總理各國事務衙門轉奏以期迅速原摺片留中將此由六百里密諭知之欽此遵

旨寄信前來

暫駐上海摺

光緒九年四月二十四日

奏為微臣行抵上海遵

旨暫行駐紮恭摺具報仰祈

聖鑒事竊臣欽奉四月初七日

寄諭事機且夕變遷惟在隨時權衡辦理該大臣現由金陵前赴

上海卽著暫在上海駐紮統籌全局將兵事餉事豫爲布置審度

機宜再定進止著將籌辦情形隨時奏聞其緊要事件並著由電

信寄知總理各國事務衙門轉奏以期迅速等因欽此遵已由籍

起程過江甯停駐三日與左宗棠籌商兵事餉事尙未就緒臣卽

乘輪船東下於四月二十二日抵上海暫行駐紮容臣審察機宜

統籌全局穩慎辦理再隨時詳晰奏

聞其有緊要事件卽由電信寄達總理衙門轉奏以期迅速所有

行抵上海駐紮緣山理合繕摺交輪船寄津發驛轉遞伏乞

皇太后

皇上聖鑒謹

奏

刊刻木質關防片

光緒九年四月二十四日

再臣抵滬後籌商兵餉與中外及各省交涉事件煩多所有奏報並咨行文牘未便仍借地方官印信已刊刻木質關防以便鈐用其文曰前大學士署北洋通商大臣行營關防即日開用理合附片陳明伏乞

聖鑒謹  
奏

請飭潘鼎新營辦片

光緒九年四月二十四日

再臣此次由原籍假期內倉猝應

召出山承辦重大事務凡積年所經營布置水陸船械兵勇及從事得力之文武員弁皆在直隸天津等處一旦舍而圖南隻身旁皇茫無措手除隨時電商署直隸督臣張樹聲擇要分別調取仍不得不兼顧畿防大局力小任重深愧竭蹶無能適有前雲南撫臣潘鼎新在籍養病途次函約晤商卽令隨同來滬贊畫機宜該前撫隨臣歷勦粵捻各匪馳驅前敵勦勞卓著智深勇沈忠誠耿耿實爲文員中不可多得之才於洋務控馭方略亦能操縱得宜合無仰懇

聖恩飭令該前撫幫同籌辦一切俾收集思廣益之助其餘應行酌調員弁容再續陳伏祈

聖鑒訓示謹  
奏

軍機大臣

密寄

光緒九年四月二十七日奉到

前大學士署辦理北洋通商事務大臣一等肅毅伯李 光緒九

年四月十八日奉

上諭前據李鴻章奏豫籌越南邊防事宜擬赴上海暫駐當諭令統籌全局將兵事餉事豫爲布置並將籌辦情形隨時奏聞法越交涉一事現無定局必須在我者兵力足恃辦理較爲有益刻下滇粵防營兵力甚單自應添撥勁旅以資備禦提督劉銘傳係李鴻章舊部宿將聲望夙著如令其調募數營統帶前赴粵西作爲後路援軍於事能否有濟著李鴻章悉心酌度據實覆陳並卽遵前旨統籌全局迅速具奏將此由五百里密諭知之欽此遵旨寄信前來

奏劉銘傳可寄邊防片

光緒九年五月十二日

再奉四月十八日

密諭提督劉銘傳係李鴻章舊部宿將聲望夙著如今其調募數營統帶前赴粵西作爲後路援軍於事能否有濟著李鴻章悉心酌度據實覆陳等因欽此竊查劉銘傳智略勇幹度越諸將從前勦辦粵捻各逆戰功最著平日究心史事時務見幾敏決才識過人若令獨當一面寄以邊防重任於操縱控馭機宜必能措置裕如其威望亦可使遠人懾服現紮津郡之劉盛休分防江陰吳淞之唐定奎吳宏洛各營皆係該提督募練而成久經大敵素稱勁旅兵將一心尤易踴躍用命

臣奉

旨後卽函招該提督來滬面商能否酌調舊部統帶赴粵該提督感激

恩知亟思及時圖報惟以舊患目疾現值肝陽上衝目蒙愈甚若  
冒暑遠役誠恐辦事掣肘病更加劇而於事仍無所裨助昨已回  
籍就醫嗣後如蒙

聖恩耀策之處應請

飭下安徽撫臣就近轉行遵照理合附片據實覆陳伏乞

聖鑒謹

奏

定期赴津封

光緒九年六月初一日

奏爲遵

旨定期起程赴津恭摺仰祈

聖鑒事竊臣承准軍機大臣密寄五月十六日奉

上諭李鴻章著仍遵前旨卽回北洋大臣署任籌備一切脫利古  
現在上海作何動靜李鴻章如定期北來須知照該使如有面議  
之事俟其到津再行商辦以示羈縻勿絕之意等因欽此五月十  
七日奉

上諭現在北洋防務緊要著該大臣仍遵十六日諭旨迅卽赴津  
籌備一切事宜勿稍延緩等因欽此法使脫利古於五月二十六  
七日來晤辯論各節已電達總理衙門察核其面遞擬辦越事節  
略內稱法兵在北圻所爲之事中國約明毫無阻撓並不顯然或

暗中干預越南之事且不稍侵甲戌條約後已有之情節事定後中國允開雲南通商口岸法國約明不犯中國邊境並願備照會切實聲明法國毫無侵佔越南土地之意等語若照該使所擬辦法是將越南屬國名分概行抹煞臣與駁辯再四該使始允將並不顯然或暗中干預越事一語刪去甲戌法越約內認越爲自主之國並無統屬最爲悖謬中國未便顯認此約該使又允將條約二字刪去謂須電請該國示遵臣亦答以必須請

國家示遵看來此事一時似難議有就緒臣自應欽遵

諭旨迅赴天津籌備一切擬於六月初二日附搭輪船北上昨詢脫利古是否赴津該使謂奉外部電信令其在滬與臣會商未便他往該使性情狡戾若臣在此專候商辦轉啟其居奇要挾之心自不可稍涉遷就如其隨後來津就商亦勿稍拒絕以仰副

朝廷羈縻勿絕之意所有定期起程赴津緣由謹繕摺由驛馳陳  
伏乞

皇太后

皇上聖鑒訓示謹

奏

潘鼎新赴湘撫任片

光緒九年六月初一日

再臣欽奉五月初二日

寄諭著傳知潘鼎新隨同北來聽候諭旨等因欽此潘鼎新正在料理束裝豫備隨臣北上旋奉署理湖南巡撫之

命該署撫臣感激

恩知亟思入覲

闕廷跪聆

聖訓惟

明旨飭令卽赴署任未便稍事稽留若守候部文行知到滬尙需時日既無經手未完事件自應催令趕緊赴湘以副

聖主驅策之至意除由該署撫臣自行奏報起程外理合附片陳

明伏乞

聖德

奏

抵津仍回署任摺

光緒九年六月初九日

奏爲

微臣行抵天津遵

旨仍回署任恭摺叩謝

天恩仰祈

聖鑒事竊臣欽奉疊次

寄諭飭回北洋大臣署任籌備一切當將由滬起程日期由驛奏報在案卽於六月初二日乘坐招商局海晏輪船航海北上順赴煙臺旅順口威海衛等處察看防務及礮臺工程初六日駛抵天津初八日准暫署北洋通商大臣張樹聲將

欽差大臣關防文卷等項派員齎送前來臣當卽恭設香案望

闕叩頭謝

恩祇領任事臣此次巡閱旅順該處礮臺工程現甫告竣其水師

船澳礮工亦均有端緒惟威海衛操演魚雷船隄房屋正在擇地  
開辦臣面飭道員袁保齡劉含芳仿照洋法妥速辦理務期工堅  
料實以裨海防要需至提督宋慶丁汝昌所部水陸各軍暨天津  
新城大沽北塘蘆臺山海關淮練各營亦飭嚴勤訓練以備緩急  
除將北洋應辦事宜督飭文武各員遵照密爲籌備並將回任日期循例恭疏  
題報外所有微臣抵津任事緣由理合繕摺

奏謝

天恩伏乞

皇太后

皇上聖鑒再臣前刊用行營木質關防即日銷燬合併聲明謹

奏

奏留薛福成片

光緒九年六月初九日

再儘先補用道薛福成前因其胞兄薛福辰奉

旨調補通永道缺循例呈請迴避經吏部籤改河南署督臣張樹  
聲飭令將經手事件交代清楚再行給咨前往現正清理完竣臣  
查薛福成器識沈毅才畀練達學術湛深前署宣化府任內於均  
徭恤獄諸事均能實力整理尤究心中外大局歷在前督臣曾國  
藩及臣處隨辦軍務洋務多年近來如煙臺議約朝鮮定變費盡  
機宜均有裨助現值越南多事籌布海防辦理交涉需才方亟擬  
請

旨准將河南候補道薛福成暫留北洋差遣以資得力理合附片

陳明伏乞

聖鑒訓示謹

癸

懇辭兼署直督摺

光緒九年六月十四日

奏為懇陳下情籲懇收回

成命恭摺仰祈

聖鑒事

臣恭閱邸鈔光緒九年六月初十日內閣奉

上諭李鴻章著署理直隸總督兼署辦理北洋通商事務大臣等因欽此仰見

皇太后

皇上廡念時艱權宜措置倚畀愈重責任彌專感涕之餘倍增惶悚伏念臣自去春驟嬰大故已覺次瀕陳愚悃籲請終制荷蒙

聖慈曲加慰留私衷耿耿慚負重疚客秋今夏臣在籍居喪營葬皆因藩邦多事奉

詔敦促不得不援金革毋避之說亟起從戎復以北洋海防事端

繁鉅臣係創辦之人遵

旨仍回署任誠以專辦通商近乎差事尙與實職不同整理防務

漸有端倪亦爲全局所繫臣受

恩深重值此事變方殷不敢不勉抑私情稍分

宵旰憂勤於萬一今奉

明諭督理督篆既有地方之權實非軍旅可比臣聞

命戰栗罔知所措竊查古之名臣前明如李賢張居正我朝如李光地其高勳碩德一時景慕皆以奪情起復致留闕或爲言路所劾或爲史冊所譏咸豐年間曾國藩胡林翼皆值寇釁方熾經從軍維時曾國藩不任封圻尙且抗疏堅求終制胡林翼雖督巡撫然奏明出省剿賊以軍事爲己任吏事則由督臣官文化爲經理如臣薦下罔敢仰望昔賢而於親喪自盡之忱夙

夜展轉未出自解甫營窠多遽隔松楸追念劬勞抱憾何極今若以負罪之身復樞重任下滋微臣貪位忘親之咎上累

聖朝孝治天下之隆既於名教有妨即使勉強從事而慚疚百端神思昏奮恐措施失宜貽誤更多亦於大局無益現在北洋創設水師整練陸軍辦理交涉與夫購船選械築臺建鴨皆臣分內應辦之事臣當就精力財力所及竭蹶經營至直隸地方政務年餘以來警督臣張樹聲凡有要事商榷苟有所見必爲指陳臣雖總理商政猶可借諮訪於同僚臣若兼轄地方更難專心力於防務轉瞬明年六月卽爲微臣釋服之期屈指光陰爲時甚暫儻蒙朝廷隨宜處置不過一轉移閒而吏治海防兩有裨益相應籲求聖主鑒臣愚忱紓臣隱疚收回

成命以立千古忠孝之閑俾臣稍免越禮之謗其爲感幸曷可名

言所有懋陳下情緣由恭摺具

奏伏乞

皇太后

皇上聖鑒訓示施行臣無任激切屏營待

命之至謹

奏

展接津通電綫摺

光緒九年六月十四日

奏爲天津至通州陸路接設電綫以捷音信而裨時局恭摺仰祈  
聖鑒事竊臣昨在上海接准總理各國事務衙門函商展電綫近  
京師一節應斟酌妥善辦理並錄示出使大臣曾紀澤電信謂可  
壯聲威以保和局靈呼應以利戰事等因臣查前年創設津滬陸  
路電綫去冬擬請推廣浙閩粵等省陸綫均奉

俞旨遵行在案此事始則稍籌官款繼則專歸商辦兩年以來妥  
慎經營官民無不稱便而沿海各省緊要官報軍報尤收便捷之  
益卽如朝鮮定變越南告警皆能瞬息傳遞應機籌措此外則英  
俄德法美日本各國出使大臣所有購船製械偵探敵情商辦交  
涉各事莫不朝發夕至雖遠隔萬里之外而近若戶庭指揮一室  
之中而捷於影響蓋電綫之在外洋與輪船鐵路相輔並行其功

用亦復相等其成本則減於輪船鐵路不啻倍蓰尤覺費省而效鉅故西洋各國凡電綫之經緯相錯枝幹相承幾於無地不有卽如法人有事越南近又添設海綫由西貢至海防河內等處直通香港約費五十萬元誠以傳遞軍報非此不能靈捷也況

神京爲中外所歸嚮發號施令需用倍切臣於創辦電綫之初頗慮士大夫見聞未熟或滋口舌是以暫從天津設起漸開風氣其於軍國要務裨益實多今總理衙門與出使大臣曾紀澤皆以近京展電爲善策旣已詢謀僉同臣與總辦津滬浙閩粵電報局候補道盛宣懷酌商擬暫設至通州因電商署督臣張樹聲遵派妥員並飭補用道朱格仁選派匠徒前往測量道里核計桿數以便興工茲據盛宣懷朱格仁稟稱委員直隸州葉金綬等帶同洋匠學生工頭循津通一路裁彎取直量至通州北關爲止所有墳塋

樹林民房均經讓出沿途興情毫無驚擾約計綫路一百八十餘里應須木桿一千七百餘根俟物料器具由滬運到即日開工設局遞信擬設往來雙綫以資周轉繪圖貼說前來臣查此次接辦通州電綫工程剋期蒞事將來外洋及各省與總理衙門電報到通局後卽封交通州專馬馳遞勿得片刻稽遲並令通永道薛福辰督飭妥辦仍隨時察商逐漸接展至京以速音信而使調度至津滬浙閩粵設綫所需巡電弁兵准由官款撥給津貼銀兩自應循案辦理除咨明總理衙門戶部外所有由津至通接設陸路電綫緣由謹會同署理直隸總督臣張樹聲恭摺具

奏伏乞

皇太后

皇上聖鑒訓示謹

奏

山海關截留餘稅片

光緒九年六月十四日

再山海鈔關自光緒七年十一月二十八日起扣至八年十一月二十七日止一年關期報滿據該關道續昌具詳正額盈餘銀兩均經徵足另行詳請奏報其加增盈餘銀八萬兩亦無虧短稽徵實屬得力除駐防八旗官兵俸餉等項不敷支放照案動撥銀二萬五千三百五十四兩二錢一分二釐九毫八絲五忽七微又漕船免徵商稅作正開除銀二萬九千九十三兩八錢一分七釐尚存銀二萬五千五百五十一兩九錢七分一絲四忽三微查前因營口爲奉省沿海緊要門戶口岸甚屬空虛防務毫無憑藉必須擇要修築礮臺方資扼守上屆該關用存加增盈餘銀二萬六千餘兩湊作該口修築礮臺之需奉

旨覽欽此欽遵在案惟核計礮臺經費不敷尙多該關除去稅項

別無可籌之款現正籌布海防待用孔亟據該關道續昌請將本屆用存加增盈餘銀二萬五千五百餘兩照案留濟急需等情前來臣覆加查核係屬實在情形仰懇

天恩俯准照數留存關庫專備修築該口礮臺之用以裨要防俟工竣據實奏銷理合會同

盛京將軍臣崇綺附片陳請伏乞

聖鑒訓示謹

奏

皇仁曷共有極所有再陳下情緣由恭摺具

奏伏乞

皇太后

皇上聖鑒訓示施行臣無任瀝血祈求悚惕待

命之至謹

奏

營口礮臺營制摺

光緒九年六月二十一日

奏為營口礮臺漸次竣工酌擬新設練兵營制章程繕單恭摺具  
奏仰祈

聖鑒事竊查營口地方為各國通商口岸奉省緊要門戶必須擇  
要修築礮臺以資扼守前據山海關道續昌於東岸第二道標杆  
處所試修土壩培墊疊道挖濠築固創立營基擬建礮臺礮房兵  
房藥庫所需經費即將該關徵存加增盈餘銀兩截留備用經臣  
於光緒七年六月二十日奏明並將該關徵存前項銀數按年分  
別奏報在案本年二月間復據該關道續昌稟稱礮臺應辦事宜  
粗具規模亟應籌兵駐守該處原設洋鎗隊五百名係由開義熊  
蓋四城甲兵內調練大半不耐勞苦難期得力且均係額設之兵  
抽調在營各城轉覺空虛其原定餉項章程較之各處練軍亦多

糜費擬將原設洋鎗隊官兵遣撤回旗片由營口附近熊蓋兩城  
務農閑散旗丁內挑選二百名並由現在助工各營餘丁內挑選  
二百名內挑練步隊三百名分爲六哨專習鎗礮駐守礮臺挑練  
馬隊一百名分爲兩哨隨時調遣巡緝彈壓計共改練馬步隊四  
百名合爲一營設管帶官一員總司其事幫帶官一員分帶馬隊  
一切營制餉需酌照直隸練軍章程操演礮位仿照大沽礮臺章  
程營哨各官選用熟習戎行精嫻紀律之綠營將弁管帶教練期  
成勁旅將來演放礮位再由大沽營挑派教習前往教練俟成軍  
後遇有隊兵缺出悉由各該城閑散旗丁挑補以符舊章所需改  
練官兵月餉費鉛丸火藥及礮臺歲修工程等項通盤核計每  
年約需銀三萬兩有餘卽將來購齊礮位增添軍火經費以原設  
洋鎗隊歲餉計之似可敷用等情經臣批令詳細妥議章程稟辦

去後茲據續昌稟稱該處原設洋鎗隊官兵五百名已於五月初一日一律遣撤回旗各酌給一箇月餉銀作爲川資仍由該道捐備車船分起歸伍所練新兵亦經先行分別挑選來營隨同工作剋日成軍酌擬練兵章程二十四條並應需餉項分繕清摺呈請核奏前來臣查營口華洋雜處地方緊要現當整頓海防之際應妥籌布置該道所擬章程均尙妥協所定餉雜各款亦均核實節省惟新修礮臺大小五座礮洞八處周圍營牆二百數十丈現因限於餉項僅練馬步隊四百名駐守巡緝兵力稍單尤在教練得法紀律嚴明務使一兵得一兵之用俟臺工告竣購齊礮位騰出餉項再行酌量添練隊伍以厚兵力而壯聲威其未盡事宜容臣督飭該道隨時酌度妥辦除將營制章程繕具清單恭呈御覽外所有營口礮臺改設練兵酌定營制章程緣由理合會同

盛京將軍臣崇綺摺具

奏伏乞

皇太后

皇上聖鑒訓示敕部知照謹

奏

謹將營口改練馬步隊章程二十四條繕具清單恭呈

御覽

計開

一 改練馬隊一百名步隊三百名共四百名合爲一營設營官一員總理馬步全營事務帶領步隊駐守礮臺月支薪水銀五十兩設幫辦官一員幫帶馬隊駐紮舊練軍營盤仍歸營官統屬遇事稟明營官辦理其營哨各官揀調熟習戎行精嫻紀律之將弁管帶教練以求實效其兵丁擬由營口附近之熊蓋兩城閑散務農旗丁內先挑選二百名再由現在駐紮營口各營餘丁內選調二百名充補練軍之缺合同操演俾資觀摩所挑兵丁總以精壯樸實能耐勞苦爲主俟成軍後教練一二年該旗丁果能奮勉學習毫無習氣遇有漢兵缺出卽由該兩城閑散旗丁陸續挑補如此

辦理能否相宜仍隨時體察情形稟辦現在一二年內旗漢兵丁各以二百名爲率遇有缺出暫行分別挑補所有營制餉需一切參酌直隸練軍及大沽礮臺章程辦理所需餉項仍請由六成洋稅項下動支

一步隊三百名應分爲六哨俾敷分布以前後中左右五哨分守礮臺礮洞等處每哨哨官一員哨長一名每哨分爲四隊每隊什長一名正兵十名共什長四名正兵四十名又護兵六名每哨共弁兵五十二員名又親軍一哨分守營門藥庫等處以及各項差使歸營官自帶設哨長一名亦分爲四隊每隊什長一名親兵十名共什長四名親兵四十名又護兵六名計親兵一哨共弁兵五十一員名所有紅旗藍旗金鼓號令皆在親兵數內以上六哨共哨官五員每員月支薪水銀十兩哨長六名每名月支薪水銀六

兩什長二十四名每名月支口糧銀四兩二錢親兵四十名每名月支口糧銀三兩九錢護兵三十六名每名月支口糧銀三兩九錢正兵二百名每名月支口糧銀三兩六錢以上共步隊弁兵三百一十一員名

一馬隊一百名平時巡緝盜賊彈壓地方有事則與礮臺互相聯絡分爲左右兩哨每哨哨官一員哨長一名每哨分爲五隊每隊什長一名正兵九名以上兩哨共計哨官二員每員月支薪水銀十二兩哨長二名每名月支薪水銀九兩字識一名月支薪水銀六兩什長十名每名月支口糧銀四兩五錢正兵九十名每名月支口糧銀四兩以上共馬隊弁兵一百零五員名

一營官兼帶馬隊應照章給馬四匹馬夫四名幫辦官馬二匹馬夫二名哨官二員各給馬二匹馬夫各二名哨長二名字識一名

各給馬一匹馬夫各一名馬兵一百名各給馬一匹以上其馬一百十三匹每四月支乾銀三兩馬夫十三名每名月支口糧銀三兩

一步隊營官並親軍哨長及親兵護兵共用伙夫二名五哨哨官哨長及護兵等共用伙夫五名其餘親兵正兵每隊各用伙夫一名以上步隊官兵共用伙夫三十一名每名月支口糧銀三兩馬隊營官及字識共用伙夫一名每哨哨官哨長共用伙夫一名兩哨計用伙夫二名每隊用伙夫一名十隊計用伙夫十名以上馬隊官兵共用伙夫十三名每名月支口糧銀三兩再查直隸練軍章程內開步隊無論行營坐營營官准用長夫十二名哨官准用長夫三名專任搬運子藥析薪擔水及一切雜差方可免分兵力不致誤操今營口新練步隊駐守礮臺所有操演放礮練習各

項技藝以及每日擦洗鎗礮隨時修理臺壘在在均需兵力較之尋常練軍差務實屬繁多且所練兵數無多分布各處實有日不暇給之勢所有搬運子藥析薪擔水一切雜差該官兵等實難兼顧仍須給以長夫支應雜差俾可免分兵力茲擬按照直隸練軍章程略爲變通辦理營官用長夫六名哨官各用長夫二名哨長各用長夫一名以上步隊官弁其用長夫二十二名每名月支口糧銀三兩設有征調所有加餉帳棚以及應添長夫等項均仿照直隸練軍章程辦理

一查直隸練軍馬隊章程幫辦官僅隨營官辦事並無專任之責今擬派幫辦官幫帶馬隊責任較重查原定章程月支薪水十兩較之馬隊哨官薪水每月少支二兩輕重似屬不倫擬請每月加給薪水銀六兩以示體恤

一查直隸練軍章程步隊一營月支公費銀一百兩馬隊一營亦如之今營口練軍馬步合爲一營自應照章月支公費銀一百兩由營官具領所有該營文案委員心紅紙張醫生獸醫均由公費項下支用旗幟號衣於成軍日先爲發款置辦一次以後卽由所支公費項下隨時添補更換總須一律整齊

一從前營口所練洋鎗隊兵丁係由各城馬甲調練除本城應領底餉並隨缺地畝外每名月加口分銀三兩每年仍各給衣帽銀五兩每年共需衣帽銀二千四百餘兩原因海口冬日嚴寒且有洋人聚處該兵丁等若稍有飭陋不但難以禦冬更恐不足壯觀致爲彼族嘲笑是以每年發給衣帽銀一款以期整齊茲擬改練新軍係用開散旗丁並招募漢勇並無底餉等項每月僅照章發給口分營口物價昂貴僅敷食用衣履實難責其齊楚不得不設

法津貼惟查從前所定衣帽銀兩數目過優現擬樽節辦理每兵每年擬各給衣帽銀二兩共需銀八百兩仍分春秋兩季由營官具領分別辦給

一馬隊官弁兵丁應用馬匹鞍轡查直隸練軍章程均由自備俾知爲己有之物各加愛惜便可兼養得宜一律臆壯當成軍之時先爲籌款購買分給以後每月由餉乾內陸續扣還歸款查營口現存舊練軍差馬四十四匹破車馬三十四匹卽先行發給應用其不敷之馬籌款分給購買所有鞍轡馬價等項一併照章按月陸續坐扣歸款

一直隸練軍章程步隊一營每月柴草銀一百四十兩馬隊一營每月柴草銀八十兩今馬步隊合爲一營自應參酌直隸練軍章程變通辦理且營口濱臨大海地係斥鹵水味鹹澀日用柴薪水

草均自遠道而來價值甚昂茲擬步隊六哨每哨月給柴薪水草銀十七兩共一百零二兩馬隊兩哨每哨月給柴薪水草銀十九兩共三十八兩馬步隊一營每月共發給柴薪水草銀一百四十兩按月由營官具領分別發給

一查從前營口練軍所住營房教場及軍火庫等處每年有歲修之款因夏則地氣潮溼冬則海風凜冽兼之土性酥城房屋牆垣最易皸裂且工料昂貴是以所費甚多近年力求撙節擇要修補每年亦在八九百兩上下歷年進報有案現擬馬隊駐紮此營人數較少嗣後均係兵丁自行工作應酌定數目以示限制擬請每年酌給銀二百四十兩分春秋兩季由營官具領隨時修理其礮臺營盤俟工竣再行稟辦

一礮臺距海口約二十餘里遇有緊急事件非有巡船往查則聲

慰難通應設頭號洋舢板船二隻以備赴海口偵探並巡查河面所用兵役人等卽由親兵內兼習駛船毋庸另設水手以節糜費每船每年擬支給公費銀八十兩所有油艖船隻修補器具及歲修一切均在其內共計巡船二隻每年共需公費銀一百六十兩由營官按春秋兩季具領至應用船隻等項於成營時先行籌款購辦以後擬仿照大沽章程每六年大修一次每三年小修一次其駛船教習就近由湄雲兵船水手內暫行調用二名每月酌量津貼俟教練熟習仍飭回船供差

一大小礮位應需津貼雜費查大沽礮臺章程三千斤以上爲大礮每尊月支銀八兩一千斤以上爲中礮每尊月支銀四兩一千斤以下爲次礮每尊月支銀二兩查營口大小礮臺並礮洞以及前面牆頂應安設大小礮位三十餘尊其餘營牆亦須酌設中次

礮二十餘尊營口現存有八千斤銅礮二尊六千斤銅礮二尊一  
千五百斤洋鐵礮一尊又蒙飭撥萬斤重阿姆斯脫朗前膛鋼礮  
二尊現由外洋購到克鹿卜後膛鋼礮四尊每尊約重三千餘斤  
並原設練軍所用五百餘斤洋鐵礮四尊噴礮四尊堪以作爲邊  
礮之用以上各礮擬請俟安設妥協開操時仿照大沽章程按月  
支給津貼其餘未購齊大小礮位俟購到後隨時稟明辦理其礮  
盤礮架及隨礮器具什物等件遇有缺損仿照大沽章程隨時籌  
款修補更換稟報

一從前營口練軍所需洋火藥等項係由天津請領如有不敷就  
近購辦年終造冊報銷現在所築礮臺安設前後膛洋礮兵丁所  
用洋鎗亦須前後膛兼備方能適用所需洋火藥子彈等項擬仍  
由天津請領設有不敷如就地采買應隨時報明北洋大臣查核

以昭核實而備稽考

一馬步兵丁應用前後膛洋鎗刀矛等件應請由購礮經費項下動用購辦其舊練軍所用前後膛洋鎗歷年已久機簧多不靈便擬擇其堪用者發給步隊備操

一所練馬步各隊以鎗礮爲正技兼練弓箭刀矛各項雜技務使人人技藝嫻熟方可應手適用其礮臺大小礮位按半月演放一次冬令封河後按期打靶其步隊除操演礮位外每月按三六九日合操演鎗打靶平日由該營哨官督率兵丁在營內比試鎗礮操法演習各項技藝其挖濠築牆修做營房均須兼作藉以習勞其馬隊由該幫帶哨弁等每日率領兵丁赴教場試馬演鎗兼習刀矛早晚在營內比試各項技藝務使一律嫻熟仍按三六九日由營官合操打靶至馬步隊所用鎗礮器械以及礮盤礮架等

器具由該營哨各官逐日督飭兵丁勤加擦洗妥爲收拾如有損壞隨時修理每月由道看操一次並查點兵丁名數及驗試各項鎗礮器械馬匹查有疏懈卽將該營哨各官等分別記過懲處以免懈弛而期經久

一礮臺所設前後膛礮位擬請由天津大沽揀派教習二員先行來營教練俟學習精熟再行撤回其教練之差卽由本營哨官哨長內兼充至所調教習應支薪水應查照大沽章程支給

一擬挑選熊蓋兩城旗丁二百名教練隊伍該旗丁等均係閑散應請毋庸拘定某城若干名以便選擇俾免遷就至該兩城附近營口八旗閑散甚多大半以務農備趁爲生嗣後如有願來投效充當餘丁者應聽其便須由營官詳加選擇分別去留果能勤奮當差遇有兵缺卽可挑補俟補兵缺後再將其旗佐知照該城查

明立案俾歸簡易

一所練旗兵如有勞績保獎無論旗綠各營官階應請准其一體保升以廣進取而資造就惟不得保補本城錢糧俾免侵佔兵缺致誤本城差操

一此項馬步練軍原爲海防而設平時應按照行軍紀律方可經久得力口營口地方華洋雜處人煙湊集最易滋生事端必須立法從嚴庶知有所顧忌所有馬步隊弁兵等由營官按日點名無故不准私自外出如奉派出差備有在外逗遛滋事者一經查出或被告發輕則棍責發落重則插箭游街如有違犯軍令或聚眾滋事以及在外搶擄姦淫種種不法各重情卽由營官稟道查明無論旗漢兵丁一面按照軍法從事一面稟報上憲查核如此峻立其法方可以資懲馭而便教練

一營官擬須給管帶奉天營口海防馬步練軍字樣木質關防一顆其幫辦官既幫帶馬隊另紫營盤亦給鈐記以昭信守擬頒給幫帶營口海防練軍馬隊幫辦官字樣鈐記一顆

一練軍營官管帶馬步各隊巡防海口駐守礮臺彈壓地面緝捕盜賊責任綦重凡礮臺布置防守一切以及操演鎗礮訓練兵丁在在均關緊要必須熟習戎行講求有素之員方克勝任嗣後遇有營官缺出擬請由直奉練軍內稟請揀員調補該營官如能訓練有法任事實心應請援照海疆營官俸滿送部引

見成案參酌辦理擬每屆三年由道出具切實考語稟請奏獎一次以昭激勸儻辦事因循玩愒不能得力由道隨時稟明分別撤參更換不得稍有瞻徇至哨弁等缺出或由道指名稟調或本營如有堪勝之人卽由道揀選拔補所補之人如無頂戴者

應給予七品頂戴以資表率該哨弁等如果技藝優長操演勤奮亦請每屆三年由道擇尤稟請予以功牌頂翎或予以升階以示鼓勵儻有操演懈弛技藝平常山道隨時分別懲辦至隊兵如有缺出由營官隨時稟道挑補其兵丁勤惰由營官隨時稽查稟道分別獎懲

一查營口原定練軍章程以道員作爲海防練兵翼長督練洋鎗隊官兵擬請嗣後改爲海防營務翼長新練之軍卽作爲道標練軍所有營哨各官等均歸道統轄以資節制而使呼應遇事稟請北洋大臣暨奉天將軍核辦

一營口爲奉省海疆要地又係通商口岸巡防最關緊要現既修築礮臺營壘設兵駐守亟須隨事實力講求方能經久無弊現雖定有章程第徒託空言仍恐日久廢弛擬於臺工告竣布置妥協

後應請北洋大臣與奉天將軍輪年派委鎮道大員來營查閱一次會道出結分別報查如有訓練不精軍實不齊以及種種廢弛各情弊卽由委員據實稟明將統轄管帶等官分別參處以昭慎重而免疏懈

辦理朝鮮商務章程摺

光緒九年六月二十一日

奏爲照章派員前赴朝鮮辦理商務酌擬章程繕單恭摺仰祈  
聖鑒事竊查光緒八年九月間經總理各國事務衙門會議奏定  
中國朝鮮商民水陸貿易章程內開嗣後山北洋大臣札派商務  
委員前往駐紮朝鮮口岸專爲照料本國商民該員與朝鮮官員  
往來均屬平行優待如禮應用經費均歸自備等語現在美國換  
約後已派使往駐漢城日本亦在仁川購地建屋中國招商局擬  
卽派船前往開拓碼頭所有商民貿易章程既經定議亟應派員  
前往察看地勢擇要駐紮以便照料華商聯絡聲氣並將應行查  
勘購置建造等事與朝鮮商酌妥辦免爲外人所佔致落後著惟  
朝鮮通商口岸三處其在東南隅者爲釜山元山商務早爲日人  
壟斷上年議開仁川一口在朝鮮西境緊接渤海距煙臺水程不

過一日距該國王京陸路不及百里華船前往販運必先聚泊仁川若派總辦商務委員往駐該國王京即可兼理仁川商務似爲當務之急經臣飭據津海關道周馥候選道馬建忠等妥議章程稟請核奏前來臣查朝鮮爲中國藩服委員前往駐紮與出使外洋各國體制稍別而情事略同自應參酌出使成案量爲變通經費一切從省核計該道等所擬章程尙屬妥協其可置爲緩圖及應隨時增損者應由委員察酌稟辦除將章程照繕清單恭呈御覽外理合專摺具陳伏乞

皇太后

皇上聖鑒敕下總理各國事務衙門嚴覆施行謹

奏

謹將酌擬派員辦理朝鮮商務章程繕具清單恭呈

御覽

計開

一由北洋大臣札派總辦朝鮮各口商務委員一員駐紮漢城兼  
管仁川口商務分辦元山口商務委員一員分辦釜山口商務委  
員一員各駐本口管理商務均由北洋大臣刊給木質關防總辦  
委員准帶隨員二員書識二名聽差六名並用英文繙譯一員朝  
鮮通事一名分辦委員准各帶書識一名聽差三名並各用英文  
繙譯一員朝鮮通事一名惟現在元山釜山華商前往尙少應俟  
該兩口商務漸興再酌派委員分往駐紮

一總辦委員到朝鮮後應照議定章程與朝鮮官和衷辦理如有  
疑難事件隨時稟請北洋大臣核示每至年終將華商到朝鮮若

千名完過進出口稅銀若干據實詳報請咨總理各國事務衙門

查考

一朝鮮民房窄狹無可租購漢城元山釜山三處擬各建委員公館一所以崇體制共約需銀一萬兩以外由總辦委員核實估計稟辦其元山釜山兩處公館先行購定地基隨後建造仁川一口係總辦委員兼管隨時往來賃借暫住目前無須另建公館至購以地基置備傢具等項應照章籌節核估稟辦

一總辦委員與分辦委員公文往來總辦用劄行分辦用申呈凡分辦委員詳報案件均由總辦核轉遇有緊要事件亦可由分辦徑稟北洋大臣衙門以期迅速

一總辦分辦委員與朝鮮官員公文往來向其政府統理衙門以下均用平行照會與各國公使領事照會均用華文或附以洋文

一遇朝鮮公會各國公使向以頭二三等職分及到任先後爲坐次朝鮮爲中國屬邦中國總辦委員爲賓中之主應坐於朝鮮官主位之上

一各口商民有控告案件由委員遵照奏定刑易章程第二條秉公分別辦理中國商民如有過犯輕則科罰重則監押免其枷杖其爲匪不法之徒酌量拘禁掌笞以示儆戒若情節重大卽解回中國交該地方官按律懲辦仍報北洋大臣查核

一查向章駐美國總領事月給俸薪銀四百兩日本正理事每月三百二十兩至三百兩二百二十兩不等日本公使署內供事每名每月薪水銀四十兩東學繙譯官每員每月薪水銀三十兩美國金山總領事隨員每員每月薪水銀一百二十五兩聽差每名每月辛飯銀三十兩今朝鮮商務委員等支領俸薪從省核計總

辦委員擬比照總領事月給銀四百兩分辦委員擬比照日本理事官月給銀三百兩二百兩不等總辦處繙譯擬月給銀一百二十兩一百兩不等分辦處繙譯擬月給銀一百兩八十兩不等隨員擬月給銀一百兩八十兩不等朝鮮迎事擬由委員照會朝鮮政府調用每名每月給銀一二十兩不等書識聽差擬由委員酌照日本使署供事美國領事聽差例核減支給

一總辦分辦委員照出使外洋之例三年一任由北洋大臣核擇勞績較著者奏請獎敘

一往來輪船價暫賃公館租資及公會公宴一切公件難以預計擬照出使外洋各國章程隨時核實動用報銷其各員月需飯食及內地車船價值跟役工價等項亦照出使外洋章程由各委員自在薪水內動用

一自總辦委員以下所需一切經費擬請在各關出使經費項下  
動支由北洋大臣隨時核飭江海關道徑行給領仍由該總辦委  
員按年造具收支細冊詳請咨報總理各國事務衙門覈銷  
一陸路如奉天之中江吉林之瑯春等處設立關卡稽察匪類徵  
收稅課等事均由北洋大臣會商奉天吉林將軍就近遴派地方  
官員辦理此次擬派總辦委員等係專管水路貿易有事可以彼  
此知照各分責成不相統轄

陳樹棠總辦朝鮮商務片

光緒九年六月二十一日

再朝鮮口岸初開中國商民前往經營貿易自必日臻繁盛時有彼此交涉事件必須熟悉情形明達大體之員前往經理始足以聯絡藩邦彈壓商庶茲查有二品銜候選道陳樹棠經前出使美國大臣陳蘭彬奏派金山總領事在任三年辦理裕如商民悅服上年臣曾派往朝鮮游歷於該國地勢民情亦頗諳悉該員樸誠端謹明練老成以之派充總辦朝鮮商務委員洵堪勝任除由臣檄飭遵照並咨會朝鮮國王外理合附片具陳伏乞

聖鑒謹

奏

李文忠公奏稿卷四十六